

Savjeti roditeljima za kupovinu igračaka i proizvoda za djecu

Minimalni kriteriji na koje treba obratiti pažnju

Porijeklo i proizvođač

Naziv proizvođača i zemlja porijekla trebaju biti navedeni na pakovanju. Na mnogim pakovanjima navedeno je samo "Proizvedeno za xxx". Ovo nisu relevantne informacije. Ne kupujte igračke na kojima nema svih potrebnih podataka.

Test na dodir

Uzmite igračku i opipajte da li ima oštre ivice, vijke ili druge dijelove koje vire, na koje se dijete može povrijediti, te da li postoji opasnost da dijete uklješti prste.

Test na miris

Testirajte igračku na miris. Ukoliko proizvod ima rezak, opor ili neugodan miris, to najčešće upućuje na prisustvo nedozvoljenih hemikalija. Naravno, to ne znači da je igračka, koja nema ovakav miris, sigurna, odnosno da nema opasnih sastojaka!

Test „čupanja“ na plišanim igračkama

Molimo Vas obratite posebnu pažnju na to da li sa plišanih i sličnih čupavih igračaka otpadaju vlakna. Uradite jednostavan test „čupanja“. Ukoliko vam tom prilikom ostane mnogo vlakana u rukama, ne kupujte proizvod, jer bebe i mala djeca mogu progutati ova vlakna.

Sastav

Dobra orijentacija za kupovinu plastičnih igračaka i proizvoda za djecu može biti natpis na pakovanju „ne sadrži ftalate“ ili „ne sadrži PVC“. U BiH se od aprila 2010. primjenjuje Odluka o ograničavanju stavljanja na tržište igračaka i proizvoda za djecu koji sadrže ftalate.

Starosna dob

Molimo Vas pridržavajte se podatka proizvođača o starosnoj dobi (npr. ukoliko na proizvodu piše „nije prikladan za djecu mlađu od 3 godine“ poštujujte to!).

Sitni dijelovi

Isprobajte da li se od proizvoda mogu odvojiti sitni dijelovi, npr. dugmići ili slični komadići, koje bi dijete moglo progutati.

Magnetni dijelovi

Igračke koje sadrže magnetne dijelove od aprila 2009. moraju biti obilježene sljedećim upozorenjem: „Upozorenje! Ova igračka sadrži magnete ili magnetne dijelove. Magneti, koji se međusobno spoje ili se spoje sa metalnim predmetom u ljudskom tijelu mogu izazvati ozbiljne ili smrtne povrede. Ukoliko je dijete progutalo ili inhaliralo magnete, odmah potražite medicinsku pomoć“

Opasne imitacije hrane

Ne kupujte proizvode koji predstavljaju opasne imitacije hrane! To su proizvodi obmanjujućeg izgleda, koji nisu prehrambeni proizvodi, ali svojim oblikom, mirisom, bojom, spoljašnjim izgledom, pakovanjem, oznakama, obimom ili veličinom liče ili podsjećaju na prehrambeni proizvod, tako da postoji mogućnost da ih djeca, ne razlikuju od prehrambenog proizvoda i stave ga u usta, sisaju ili progutaju, što može predstavljati opasnost i izazvati npr. gušenje, trovanje te perforiranje ili opstrukciju probavnog trakta. U BiH su od januara 2010. zabranjeni proizvodnja, stavljanje na tržište, uvoz i izvoz ovakvih proizvoda.

Igračke sa baterijskim napajanjem

Prekontrolišite da li je dio u koji se stavljaju baterije dobro osiguran u odnosu na otvaranje. Baterije ni u kom slučaju nisu predmet dječje igre i ne smiju dospjeti u dječje ruke.

CE znak

CE znak mora biti postavljen na svakoj igrački ili pakovanju igračke, koja je kupljena unutar EU. Iako BiH nije članica EU, na našem tržištu se mogu kupiti igračke i proizvodi za djecu obilježene CE znakom. **Međutim**, ovaj znak **NE** dokazuje automatski da kupujete siguran proizvod.

Povlačenje / Povrat igračaka

Može se desiti da se neka igračka ili proizvod za djecu povlači sa tržišta i/ili od potrošača. Pratite obavještenja koja se objavljuju u štampanim i elektronskim medijima. Ukoliko je proizvod, koji ste kupili, predmet jedne ovakve akcije, postupite prema uputstvu iz obavještenja o povlačenju/povratu. (www.annt.gov.ba)